

四庫全書薈要

• 乾隆御覽本

經部

欽定四庫全書叢要

經部

禮記注疏卷四十八

九

詳校官編修臣程嘉謨



禮記注疏卷四十八

漢鄭氏注 唐陸德明音義 孔穎達疏

祭義

君子反古復始不忘其所由生也是以致其敬發其情

竭力從事以報其親不敢弗盡也注從事謂脩薦可以

祭者也疏

正義曰此一節申明明反古復始竭力報親之事是以致其敬發其情者以君子反古復始

不忘其所由生是以故致其恭敬發其情性竭力從事以報其親謂竭力盡氣力隨從其事以上報其親不敢不

也極盡是故昔者天子為籍千畝冕而朱紘躬秉耒諸侯

為籍百畝冕而青紘躬秉耒以事天地山川社稷先古

以為醴酪齊盛於是乎取之敬之至也注籍籍田也先

古先祖音義

籍在亦反籍田說文作藉紘音宏耒力內反酪音洛齊音咨本亦作齊

疏正義

曰以君子報親不敢不盡心以事之故古天子諸侯有籍田以親耕以事天地山川社稷先古者上雖總論天子諸侯此言天地者特據天子自外則通先古謂先祖也以為醴酪齊盛於是乎取之者為祭祀諸神須醴酪粢盛之屬於是乎籍田而取之敬之至也

古者天子諸侯必有養獸之官及歲時齊戒沐浴而躬

朝之犧牲祭牲必於是取之敬之至也君召牛納而視之擇其毛而卜之吉然後養之君皮弁素積朔月月半君巡牲所以致力孝之至也注歲時齊戒沐浴而躬朝之謂將祭祀卜牲君朔月月半巡視之君召牛納而視

之更本擇牲意音義

朝直遙反注躬朝同牲音全

疏

正義曰此一經明孝子報親竭

力養牲之事及歲時齊戒沐浴而躬朝之者云歲時謂每歲依時謂朔月月半也躬親也既卜牲吉在牢養之而身朝之言朝者敬辭也犧牲祭牲必於是取之者犧純色謂天子牲也牲完也謂諸侯牲也犧牲所祭之牲必於是養獸之官受擇取之養獸者若周禮牧人也君召牛納而視之者此更本擇牲之時君於牧處更命取

牛采納之於內而視之君皮弁素積朔月月半君巡牲者即前言歲時朝之也巡行也皮弁諸侯視朔之服朔月月半君服此衣而巡牲所以致力孝之至也者是孝道之至極耕藉云敬之至養牲云孝之至互文也

古者天子諸侯必有公桑蠶室近川而為之築宮仞有三尺棘牆而外閉之及大昕之朝君皮弁素積卜三宮之夫人世婦之吉者使八蠶于蠶室奉種浴于川桑于公桑風戾以食之注大昕季春朔日之朝也諸侯夫人三宮半王后也風戾之者及早涼脆採之風戾之使露氣燥乃以食蠶蠶性惡溼音義

近附近之近仞音刃七尺曰仞昕許斤反日欲

出蠶才南反奉芳勇反下及注同種章勇反戾力計反
燥也食音嗣蚤音早本亦作早脆七歲反燥悉早反惡

烏路反

歲既單矣世婦卒蠶奉繭以示于君遂獻繭于夫

人夫人曰此所以為君服與遂副禕而受之因少牢以

禮之注歲單謂三月月盡之後也言歲者蠶歲之大功

事畢於此也副禕王后之服而云夫人記者容二王之

後與禮之禮奉繭之世婦音義

單音丹繭古典反與音餘注同禕音暉

古

之獻繭者其率用此與注問者之辭音義

率音類又音律又所律反

及良日夫人繅三盆手遂布于三宮夫人世婦之吉者

使繅遂朱綠之玄黃之以為黼黻文章服既成君服以

祀先王先公敬之至也注三盆手者三淹也凡繅每淹

大總而手振之以出緒也音義

繅悉刀反下同說文作繅云抽繭出絲也以此

為旒繆字音所咸反盆蒲奔反淹也

疏

正義曰此一節廣明孝子報親

養蠶為祭服祀先王先公之事公桑蠶室者謂官家之

桑於處而築養蠶之室近川而為之者取其浴蠶種便

也築宮仞有三尺棘牆而外閉之者築宮謂築養蠶宮

牆七尺曰仞言牆之七尺又有三尺高一丈也傳曰雉

有三尺雉字者誤也棘牆者謂牆上置棘外閉謂扇在

戶外閉也天昕之朝為季春朔日之朝卜三宮之夫人

者諸侯之夫人中王后故三宮世婦之吉者亦諸侯世

婦卜取之吉者前雖則總舉天子諸侯此特舉諸侯互

言之奉種浴于川者言蠶將生之時而又浴之初於仲
春已浴之至此更浴之風戾以食之者戾乾也凌早采
桑必帶露而涇蠶性惡涇故乾而食之歲既單矣者單
盡也三月之末四月之初遂獻繭于夫人者蠶是婦人
之事故獻繭于夫人夫人曰此所以為君服與者所舉
奉處重遂副褱而受之者既擬于君之祭服故夫人首
著副身著褱衣受此所獻之繭因少牢以禮之接獻繭
之世婦古之獻繭者其率用此與者率法也夫人曰獻
繭之法自古如此邪重事之義故問之也及良日夫人
繅者良日謂吉日宜繅之日明繅更擇吉利之日日至
而後乃夫人自繅三盆手猶三淹也手者每淹以手
振出其緒故云三盆手遂布于三宮夫人世婦之吉者
使繅者以夫人親繅三盆以手振出其緒訖遂布與三
宮夫人世婦之吉者既據諸侯言之則夫人唯一入世
婦之吉者此雜互天子而言之以天子有三夫人就其
中取吉者若諸侯唯世婦之吉者養蠶繅非一人而已

唯云世婦之吉者擇其吉者以為主領非唯一人而已
以祀先王先公敬之至也者前又解耕藉男子之事故
云以事天地山川社稷兼云先祖養蠶是婦人之事婦
人不與外祭故云以祀先王先公其實養蠶為衣亦事
天地山川社稷注正義曰案內司服注云唯二王後褱
衣與此注同案明堂位魯公夫人亦用褱衣此不言者
魯為特賜非常法
此據常者故不言

君子曰禮樂不可斯須去身注斯須猶須臾也致樂以
治心則易直子諒之心油然而生矣易直子諒之心生則
樂樂則安安則久久則天天則神天則不言而信神則
不怒而威致樂以治心者也注子讀如不子之子諒信

也油然物始生好美貌音義

易以鼓反下同子如字徐將吏反及下注同諒音亮

下同油音由樂樂並音洛下不樂同

致禮以治躬則莊敬莊敬則嚴威注

躬身也心中斯須不和不樂而鄙詐之心入之矣外貌

斯須不莊不敬而慢易之心入之矣故樂也者動於內

者也禮也者動於外者也樂極和禮極順內和而外順

則民瞻其顏色而不與爭也望其容貌而衆不生慢易

焉注極至也音義

爭爭闢之爭

故德煇動乎內而民莫不承

聽理發乎外而衆莫不承順注理為言行也音義

煇音煇行

下孟反下理行而行皆同故曰致禮樂之道而天下塞焉舉而錯之

無難矣注塞充滿也音義

而錯本又作措七故反

樂也者動於內

者也禮也者動於外者也故禮主其減樂主其盈禮減

而進以進為文樂盈而反以反為文注減猶倦也盈猶

溢也樂以統情禮以理行人之情有溢而行有倦倦而

進之以能進者為文溢而使反以能反者為文文謂才

美音義

減胡斬反又古斬反下同

禮減而不進則銷樂盈而不反則

放故禮有報而樂有反注報皆當為褒聲之誤音義

銷音

消報依注音褒

保毛反下音同禮得其報則樂樂得其反則安禮之報

樂之反其義一也疏

正義曰此一節已具於樂記但記者別人故於此又記之其義已具

在樂記故於此不繁文也

曾子曰孝有三大孝尊親其次弗辱其下能養公明儀

問於曾子曰夫子可以為孝乎曾子曰是何言與是何

言與君子之所謂孝者先意承志諭父母於道參直養

者也安能為孝乎注公明儀曾子弟子音義

養羊尚反後皆同與

音餘先悉薦反參徐所林反

曾子曰身也者父母之遺體也行父母

之遺體敢不敬乎居處不莊非孝也事君不忠非孝也

蒞官不敬非孝也朋友不信非孝也戰陳無勇非孝也

五者不遂哉及於親敢不敬乎注遂猶成也音義

蒞音利又

音類本又作涖陳直觀反哉音灾於親本又作裁及於身

亨孰羶薌嘗而薦之非孝

也養也君子之所謂孝也者國人稱願然曰幸哉有子

如此所謂孝也已注然猶而也音義

亨音彭反薦將見反

衆之本

教曰孝其行曰養養可能也敬為難敬可能也安為難

安可能也卒為難父母既没慎行其身不遺父母惡名

可謂能終矣仁者仁此者也禮者履此者也義者宜此

者也信者信此者也強者強此者也樂自順此生刑自

反此作曾子曰夫孝置之而塞乎天地溥之而橫乎四

海施諸後世而無朝夕推而放諸東海而準推而放諸

西海而準推而放諸南海而準推而放諸北海而準注

無朝夕言常行無輟時也放猶至也準猶平也音義遺

字又于季反樂音岳皇五孝反溥本亦作敷同芳于如詩

反放甫往反下同至也準諸尹反平也輟張劣反

云自西自東自南自北無思不服此之謂也曾子曰樹

木以時伐焉禽獸以時殺焉夫子曰斷一樹殺一獸不以其時非孝也注夫子孔子也曾子述其言以云音義

斷丁管反孝有三小孝用力中孝用勞大孝不匱注勞猶功

也音義匱其愧反下同思慈愛忘勞可謂用力矣尊仁安義可

謂用勞矣博施備物可謂不匱矣注思慈愛忘勞思父

母之慈愛已而自忘已之勞苦音義施始豉反父母愛之喜

而弗忘父母惡之懼而無怨注無怨無怨於父母之心

音義惡烏路反父母有過諫而不逆注順而諫之父母既没

必求仁者之粟以祀之此之謂禮終注喻貧困猶不取

惡人物以事亡親疏

正義曰此一節以下至可謂孝矣廣明為孝子之事今各依文解之

孝有三者大孝尊親一也即是下文云大孝不墮聖人為天子者也尊親嚴父配天也其次弗辱二也謂賢人為諸侯及卿大夫士也各保社稷宗廟祭祀不位傾危以辱親也即與下文中孝用勞亦為一也其下能養三也謂庶人也與下文云小孝用力為一能養謂因天分地以養父母也先意承志諭父母於道者先意謂父母將欲發意孝子則預前逆知父母之意而為之是先意也承志謂父母已有志已當奉承而行之諭父母於道者或在父母意先或在父母意後皆曉諭父母將歸於正道也五者不遂裁及於親敢不敬乎者遂猶成也若行在上五者事不成其如是裁害必及親所以為非孝然則君子於上五者豈敢不敬而承之者乎亨熟膾臠

嘗而薦之非孝也養也者言亨熟羶薌之美先自口嘗而後薦之父母此非孝也唯是供養君子之所謂孝也者國人稱願然曰幸哉有子如此所謂孝也已者言嘗薦美食但是養也非論孝子言若人將為孝曰此子百行皆美一國之人稱揚羨願然曰如此是羨願之云此子父母有幸遇哉而有孝子如此所謂孝也已謂然而令人羨願如此乃所謂孝也衆之本教曰孝者言孝為衆行之根本以此根本而教於下名之曰教孝則孝經云孝者德之本又云教民親愛莫善於孝是衆行之根本以教於民故謂之孝也其行曰養者言不能備孝之德其唯行奉上之禮但謂之養者也養可能也敬為難者言供養父母可能為也但尊敬父母是為難也敬可能也安為難者其敬雖難猶可為也但使父母安樂為難也安可能也卒為難者卒終也父母在曰使之安樂猶可能也但父母沒後終身行孝是為難也父母既沒慎行其身不遺父母惡名可謂能終矣者解卒為難之

事其卒者謂父母既沒之後謹慎奉行其身恒在善道不遺與父母惡名孝子如此可謂能卒矣仁者仁此者也此謂孝也言欲行仁者先仁恩於此孝也言欲行仁於外必須行仁恩於父母也故云仁者仁此者也禮者履此者也履踐履也言欲行禮於外者必須履踐此孝者也義者宜此者也言欲行義於外者必須得宜於此孝也行孝得宜乃可施義於外信者信此者也言欲行誠信於外須誠信於孝道言孝道誠信始可誠信於外強者強此者也言欲強盛於外者必須強盛於孝道言行孝道強盛則能強盛於外樂自順此生者自由也言身之和樂由順從孝道而生若能順從孝道則身和樂刑自反此作者言身受刑戮由反此孝道而興作若違反孝道則刑戮及身曾子曰夫孝置之而塞乎天地者自此以前皆曾子之言但此以下事異故更言曾子曰夫孝置之而塞乎天地者置謂措置也言孝道措置於天地之間塞滿天地言上至天下至地謂感天地神明

也溥之而橫乎四海者溥布也布此孝道而橫被於四海言孝道廣遠也溥字而定本作傳傳溥古字傳著之名義俱通其義如此一也施諸後世而無朝夕者諸於也謂施此孝道於後世而無一朝一夕而不行也終長行之言長久推而放諸東海而準至北海而準者推謂推排也放至也諸於也言推排孝道至於四海能以為灋準平而灋象之無所不從也詩云自西自東自南自北無思不服者詩大雅文王有聲之詩美武王也言武王之德能如此今孝道亦然四海之內悉以準灋而行之與武王同故引以證之曾子曰樹木以時伐焉者至此之謂禮終亦是曾子之言以語更端故更云曾子思慈愛忘勞可謂用力矣者以庶人思父母慈愛忘己躬耕之勞可謂用力矣尊仁安義可謂用勞矣者諸侯卿大夫士尊重於仁安行於義心無勞倦是可謂用勞矣博施備物可謂不匱矣者匱乏也廣博施則德教加于百姓刑于四海是也備物謂四海之內各以其職來助

祭如此即是
大孝不匱也

樂正子春下堂而傷其足數月不出猶有憂色門弟子
曰夫子之足瘳矣數月不出猶有憂色何也樂正子春
曰善如爾之問也善如爾之問也吾聞諸曾子曾子聞
諸夫子曰天之所生地之所養無人為大父母全而生
之子全而歸之可謂孝矣不虧其體不辱其身可謂全
矣注曾子聞諸夫子述曾子所聞於孔子之言音義數色
主反下同瘳故君子頃步而弗敢忘孝也今予忘孝之

道予是以有憂色也注頃當為跬聲之誤也予我也音

義

頃讀為跬缺碑反又丘弭反
一舉足為跬再舉足為步

壹舉足而不敢忘父母

壹出言而不敢忘父母壹舉足而不敢忘父母是故道

而不徑舟而不游不敢以先父母之遺體行殆壹出言

而不敢忘父母是故惡言不出於口忿言不反於身不

辱其身不羞其親可謂孝矣注徑步邪趨疾也忿言不

反於身人不能無忿怒忿怒之言當由其直直則人服

不敢以忿言來也音義

徑古定反邪似
嗟反趨七俱反疏正義曰此一節論樂正子

春傷其足而憂因明父母遺體不可損傷之事無人為大者言天地生養萬物之中無如人最為大故孝經云天地之性人為貴是也不虧其體不辱其身可謂全矣者非直體全又須善名得全若能不虧損形體得全不損辱其身是善名得全也故君子頃步而弗敢忘孝也者頃跬也謂一舉足君子於一舉足之間不敢忘父母也言忘之恐有傷損是故道而不徑者謂於正道而行不由邪徑正道平易於身無損傷邪徑險阻或於身有患舟而不游者言渡水必依舟船不浮游水上乘舟則安浮水則危不敢以先父母之遺體行殆者以其不忘父母之遺體故不敢以先父母遺餘之體而行歷危患處惡言不出於口者悖逆惡戾之言不出於口為人所賤也忿言不反於身者謂已之言必能正直人則服之故他人瞋忿之言不反於身定本反於身作及字不辱其身不羞其親可謂孝矣者總結舉足出言二事身及親並不羞辱可謂孝也矣

昔者有虞氏貴德而尚齒夏后氏貴爵而尚齒殷人貴

富而尚齒周人貴親而尚齒注貴謂燕賜有加於諸臣

也尚謂有事尊之於其黨也臣能世祿曰富舜時多仁

聖有德後德則在小官疏

正義曰此前經明孝以下至弗敢犯又兼明孝弟故下云

孝弟發諸朝廷事兼孝弟也各隨文解之今此一經論
四代悌順尚齒之義有虞氏貴德而尚齒者虞氏帝德
弘大故貴德德之中年高者在前是德中尚齒夏后氏
貴爵而尚齒者夏后之世漸澆薄不能貴德而尚功功
高則爵高既貴其官爵德雖下而爵高者則貴之由道
劣故也故貴爵之中年高者在前故云尚齒殷人貴富
而尚齒者殷人又劣於夏但身有功則與之重爵殷家
累世有功世爵而富乃貴之故云貴富亦年高者在前

故云尚齒周人貴親而尚齒者周人又劣於殷敬愛彌
狹殷人疏而富者猶貴之周人於已有親乃貴之就此
之中亦年高者在前故云尚齒注正義曰鄭恐經云貴
者皆班序在上故名之貴謂燕賜有加於諸臣凡四代
朝位班序皆以官爵為次悉皆重爵而夏后氏貴者但
於爵高者加恩賜云尚謂有事尊之於其黨也者謂德
爵富親各於其黨類之中而被尊也云舜時多仁聖有
德後德則在小官者鄭解虞氏貴德之意以舜時仁聖
者多人皆有德其德小先來者已居大官其德大後來
者則在小官是小官而德尊者故有虞氏貴之所以燕
賜加於大官俗本
後德多作小德者

虞夏殷周天下之盛王也未有遺年

者年之貴乎天下久矣次乎事親也注言其先老也疏

正義曰此一經覆述虞夏以來尚年之事虞夏殷周天
下之盛王也未有遺年者言虞夏殷周雖是明盛之王

也未有遺棄其年者悉皆尚齒更無他善以加之年之貴乎天下久矣者從虞夏以來貴在是久矣次乎事親也者言貴年之次第近於事親之孝除孝則次第也

是故朝廷同爵則尚齒七十杖於朝君問則席八十不俟朝君問則就之而弟達乎朝廷矣注同爵尚齒老者

在上也君問則席為之布席於堂上而與之言凡朝位

立於庭魯哀公問於孔子命席不俟朝君揖之即退不

待朝事畢也就之就其家也老而致仕君或不許異其

禮而已音義

於朝直遙反後皆同弟音疏正義曰此一悌下及下注同為于偽反疏經明朝廷之

中行於弟也是故朝廷同爵則尚齒者此因前文尚年以是之故朝廷之中同爵則尚齒官爵同者則貴尚於齒四代皆然七十杖於朝君問則席者以其尚齒故七十者許之據杖於朝若君有問則布席令坐也八十不俟朝君問則就之者年已八十不但杖於朝而已見君揖則退不待朝事畢也若君有事問之則就其室是遜弟敬老之道通達於朝廷矣注正義曰知朝位立於庭者案燕禮大射君與卿大夫皆立卿大夫立於庭君立于阼階上是也云魯哀公問於孔子命席者儒行文云不俟朝君揖之即退者案燕禮大射卿大夫立于庭北面君降自阼階南鄉卿卿西面爾大夫大夫皆少進皆北面爾謂揖也於時老臣君揖則退不待朝事畢也則於路寢門外曰視朝亦揖竟即退不待朝事畢也云老而致仕君或不許異其禮而已者案曲禮云大夫七十而致事若不得謝是或不許也此經中所云是君不許者故七十杖於朝君問則席又八十不俟朝是異其

禮若其致事君許則王制云七十不
侯朝八十杖於朝是君許者與此異行肩而不併不錯

則隨見老者則車徒辟斑白者不以其任行乎道路而

弟達乎道路矣注錯鴈行也父黨隨行兄黨鴈行車徒

辟乘車步行皆辟老人也斑白者髮雜色也任所擔持

也不以任少者代之音義

併步頃反徐扶頂反辟音避注同行戶剛反下同擔都甘

反少詩照反下同

居鄉以齒而老窮不遺強不犯弱衆不暴寡

而弟達乎州巷矣注老窮不遺以鄉人尊而長之雖貧

見無子孫無棄忘也一鄉者五州巷猶閭也音義

遺如字一

本作墮其媿反長疏

正義曰此一節明弟通達於道路行肩而不併者謂老少並行言肩

臂不得併行少者差退在後則朋友肩隨是也不錯則隨者若兄黨為鴈行之差錯是父黨則隨從而為行見

老者則車徒辟者謂少者或乘車或徒步若逢見老者則辟之班白者不以其任行乎道路者任謂擔持言班

白不以所任之物行於道路少者必代之是弟通達於道路注正義曰錯參差假鴈行為行父黨隨行王制文

古之道五十不為甸徒頒禽隆諸長者而弟達乎搜狩

矣注四井為邑四邑為丘四丘為甸甸六十四井也以

為軍田出役之法五十始衰不從力役之事也頒之言

分也隆猶多也及田者分禽多其老者謂竭作未五十

者春獵為搜冬獵為狩音義

甸田見反頒音班搜本亦作虔音蒐所求反狩音獸

軍旅什伍同爵則尚齒而弟達乎軍旅矣注什伍士卒

部曲也少儀曰軍尚左卒尚右音義

卒子忽反下同

疏

正義曰此一節

明弟道達於搜狩古之道者謂作記之人在於周末於時力役煩重卻道周初之事故云古之道也五十不為

甸徒者謂方八里之甸徒謂步卒軍法八里出長轂一乘步卒七十二人謂之甸者以供軍賦及田役之事五

十者氣力始衰不為此甸役徒卒頒禽隆諸長者謂四十九以下田畢頒禽之時多長者注正義曰四井為邑

至六十四井也司馬法文云以為軍田出役之法者謂一甸之中出長轂一乘甲士三人步卒七十二人供君

田役事故云以為軍田出役之法云五十始衰不從力役之事也者王制文云謂竭作未五十者案小司徒云

凡起徒役毋過家一人以其餘為羨唯田與追胥竭作
若田與追胥竭作之時此未五十者猶任田役故頒禽
之時多此長者云春獵為搜冬獵為狩爾雅釋天文經
云搜狩夏苗秋獮可知也五人為伍二伍為什士謂甲
士卒謂步卒在軍旅之中時主
帥部領團曲而聚故云部曲

孝弟發諸朝廷行乎道路至乎州巷放乎搜狩脩乎軍

旅衆以義死之而弗敢犯也注死之死此孝弟之禮音

義

放方疏正義曰此一節總論結上文孝弟發諸朝廷
往反疏者即上文而弟達乎朝廷是也在上諸文但

云弟此兼云孝者以孝故能弟弟則孝之次也此經總
結前諸文故云孝弟也衆以義死之而弗敢犯也者言
孝弟之道通於朝廷行於道路州巷搜狩軍旅無處不
行孝弟以教衆庶也故衆以道理之義死於孝弟也言

行孝弟雖死不敢
犯此孝弟而不行也

祀乎明堂所以教諸侯之孝也食三老五更於大學所
以教諸侯之弟也祀先賢於西學所以教諸侯之德也
耕藉所以教諸侯之養也朝覲所以教諸侯之臣也五
者天下之大教也注祀乎明堂宗祀文王西學周小學

也先賢有道德王所使教國子者音義

食音嗣下同更古衡反下同大

學音泰下大學

疏

正義曰此一節廣明孝弟之道養三老五更及齒學之事祀乎明堂所以

教諸侯之孝也者於周言之祀文王也故樂記云祀文
王於明堂是也食三老五更於大學所以教諸侯之弟

也者案孝經云雖天子必有父也注謂養老也父謂君老也此食三老而屬弟者以上文祀文王於明堂為孝故以食三老五更為弟大有所對也祀先賢於西學所以教諸侯之德也者以先賢有德故祀之令諸侯尊敬有德故云教諸侯之德此西學鄭注云周小學則周之小學在西郊則王制云養庶老於虞庠虞庠在國之西郊是也注正義曰云祀乎明堂宗祀文王者鄭以樂記武王伐紂稱祀乎明堂而民知孝彼謂文王廟制如明堂武王伐紂後而祀之恐此祀乎明堂亦與彼同故云謂宗祀文王也實於明堂之中知者以此經廣明周法故五者天下之大教明不獨論武王是指周公制禮之後宗祀文王也云西學周之小學也者謂虞庠也以祀先賢明於虞庠小學故大司樂云凡有道者有德者使教焉死則以為樂祖祭於瞽宗文王世子又云書在上庠以此知祭先賢所通之經各有所習之學若瞽宗則在國虞庠為小學者則在西郊今祀先賢則於西郊也

食三老五更於大學天子袒而割牲執醬而饋執爵而
醕冕而總干所以教諸侯之弟也是故鄉里有齒而老
窮不遺強不犯弱衆不暴寡此由大學來者也注割牲
制俎實也冕而總干親在舞位以樂侑食也教諸侯之

弟次事親音義

醕音肩又
仕覲反

天子設四學當入學而天子

齒注四學謂周四郊之虞庠也文王世子曰行一物而

三善皆得唯世子而已其齒於學之謂也疏

正義曰此
一節明養

三老五更之禮而竭其力下象其德天子袒而割牲者
謂牲入之時天子親割也執醬而饋者謂食之時親執

醬而饋也執爵而醕者謂食罷親執爵而醕之也冕而總干者干盾也親在舞位持盾而舞也是故鄉里有齒者以天子敬老鄉里化之故有齒也老窮不遺者老而被養故在下年老及困窮者皆化上而養之故不見遺棄作記者以老弱被尊養人皆化上故強不犯弱衆不暴寡此由大學來者也所致此養三老五更於大學由此化而來天子設四學者謂設四代之學周學也殷學也夏學也虞學也當入學而天子齒天子設四學以有虞庠為小學設置於四郊是天子設四學據周言之當入學而天子齒者當入學之時而天子齒於國人故云而大子齒注正義曰皇氏云四郊虞庠以為四郊皆有虞庠

天子巡守諸侯待于竟天子先見百年者注問其國君

以百年者所在而往見之音義

守手又反本亦作狩竟居頌反

八十九

十者東行西行者弗敢過西行東行者弗敢過欲言政

者君就之可也注弗敢過者謂道經之則見之疏

正義曰此

一節亦明尚齒貴老之義天子巡守者謂巡行守土諸侯諸侯待于竟天子先見百年者謂天子問此諸侯之國內有百年之人天子則先往就見百年者八十九十者東行西行者弗敢過者既未滿百歲不可一一就見若天子諸侯因其行次或東行西行至八十九十者或問里之旁不敢過越而去必往就見之欲言政者君就之可也者謂八十九十之人雖不當道路左右欲共言論政教君即往就之可也

壹命齒于鄉里再命齒于族三命不齒族有七十者弗敢先注此謂鄉射飲酒時也齒者謂以年次立若坐也

三命列國之卿也不復齒席之於賓東不敢先族之七

十者謂既一人舉觶乃入也雖非族亦然承齒乎族故

言族爾音義

復扶又反下文注將復入同觶之豉反

七十者不有大故不

入朝若有大故而入君必與之揖讓而后及爵者注謂

致仕在家者其入朝君先與之為禮而后揖卿大夫士

疏

正義曰此一節明鄉里之中敬齒之法一命齒于鄉里者此謂鄉射飲酒之時身有一命官者或立或坐

齒與鄉人同再命齒于族者謂身有再命之官其命既高鄉人疏者雖復年高不與之齒但族親之內計長幼為班序三命不齒者謂身有三命官其命轉尊不復齒於親族謂特坐賓東族有七十者弗敢先者若此飲酒

之時族親之內有年七十者令其先入此三命者乃始
後入故云不敗先也注正義曰此經云齒于鄉里齒于
族未知何時如此故明之云謂鄉射飲酒時鄉射謂鄉
人詢衆庶而為射於時先行飲酒之禮是鄉射有飲酒
者也又云飲酒者謂鄉人飲酒及黨正飲酒此注鄉射
飲酒兼此三義也今案儀禮鄉飲酒及鄉射無一命齒
于鄉里再命齒于族之文此一命再命之文在黨正故
鄭注鄉飲酒云此篇無正齒位之事是也雖無正齒位
之事其實鄉射鄉飲酒亦有正齒位之禮但文不備也
故此云鄉射飲酒以總正齒位之事也云齒者謂以年
次立若坐也者士立於堂下大夫坐於堂上知者鄉射
云大夫受獻訖及衆賓皆升就席於時雖立至徹俎即
坐鄉射記又云既旅士不入不見士坐之文明立于堂
下云三命列國之卿也者據諸侯言之謂當飲酒之時
若天子國黨正飲酒三命不齒謂上士也以天子上士
三命故也此經雖據諸侯亦謂黨正飲酒故云三命不

齒鄭注三命列國之卿若其鄉飲酒諸侯之國但爵位
為卿大夫雖再命一命皆得不齒以鄉飲酒賓賢能其
賓必少其得爵為卿大夫者必年長於賓故在賓東西
面而不齒若黨正飲酒以正齒位其賓必長故天子諸
侯之國三命乃不齒知鄉飲酒爵為卿大夫乃不齒者
案鄉飲酒云席于賓東公三重大夫再重注云席此二
者於賓東尊之不與鄉人齒也天子之國三命者乃不
齒於諸侯之國爵為大夫則不齒是大夫坐於上士立
於下者謂諸侯之國若天子黨正飲酒一命下士立於
下再命中士齒於父族坐於堂上三命上士席於賓東
云不敢先族之七十者謂既一人舉觶乃入也者族七
十者初飲酒之時則與眾賓先入此三命者得為待獻
賓獻介獻眾賓之後至一人舉觶之時乃始入也故鄉
飲酒鄉射記皆大夫樂作之前一人舉觶之後乃始得
入也若然大夫之入依禮自當一人舉觶之時縱令無
族人七十者亦當如此又族之七十者及鄉人少者於

先已入今特云族有七十者不敢先記人之意以身有三命應合在族人七十者之先欲明敬齒上老故云不敢先爾是以鄭注云雖非族亦然但鄉人長老皆上之既入然後始入此有族有七十者熊氏云謂黨正飲酒故正齒位故有七十若鄉飲酒之禮則無七十者故鄉飲酒明日乃息司正告于先生君子是老者明日乃入也

天子有善讓德於天諸侯有善歸諸天子卿大夫有善薦於諸侯士庶人有善本諸父母存諸長老祿爵慶賞成諸宗廟所以示順也注薦進也成諸宗廟於宗廟命之祭統有十倫六曰見爵賞之施焉音義

見賢遍反疏
施始歧反

正義曰此一節明有善讓於尊
上示以敬順之道不敢專也

昔者聖人建陰陽天地之情立以為易易抱龜南面天
子卷冕北面雖有明知之心必進斷其志焉示不敢專
以尊天也善則稱人過則稱己教不伐以尊賢也注立

以為易謂作易易抱龜易官名周禮曰大卜大卜主三

兆三易三夢之占音義

卷古本反知音斷丁亂反

疏

正義曰此一節亦明其不

敢專輒尊賢之事也立以為易者聖人謂伏羲文王之
屬興建陰陽天地之情仰觀天文俯察地理立此陰陽
以作易即今時易也易抱龜南面天子卷冕北面者立
為占易之官抱龜南面尊其神明故南面天子親執卑

道服袞冕北面必進斷其志焉者言天子雖有顯明哲
知之心必進於龜之前令龜斷決其已之所有為之志
示不敢自專以尊敬上天也教不伐以尊賢也者有善
稱人有過稱已教在下不自伐其善以尊敬賢人也注
正義曰此稱官者於周禮稱大卜三兆者玉瓦原也鄭
注云言兆形似玉瓦原之豐辨原田也杜子春云玉兆
帝顓頊之兆瓦兆帝堯之兆原兆有周之兆三易者連
山歸藏周易杜子春云連山安戲歸藏黃帝鄭作易讚
云夏曰連山殷曰歸藏周曰周易三
夢一曰致夢二曰騎夢三曰咸陟

孝子將祭祀必有齊莊之心以慮事以具服物以脩宮
室以治百事注謂齊之前後也及祭之日顏色必溫行
必恐如懼不及愛然注如懼不及見其所愛者音義

曲恐

勇其奠之也容貌必溫身必詘如語焉而未之然注奠

之謂酌尊酒奠之及酌之屬如語焉而未之然如有所

以語親而未見答音義

以語魚預反

宿者皆出其立卑靜以

正如將弗見然注宿者皆出謂賓助祭者事畢出去也

如將弗見然祭事畢而不知親所在思念之深如不見

出也及祭之後陶陶遂遂如將復入然注思念既深如

覩親將復入也陶陶遂遂相隨行之貌音義

陶音遙遂本又作燧

遂音是故慤善不違身耳目不違心思慮不違親結諸心

形諸色而術省之孝子之志也注術當為述聲之誤也

音義

思息嗣反術義作述

疏

正義曰此一節明孝子將祭祀之時顏色容貌務在齊莊卑誦思念其親

存也以慮事者言孝子先齊莊其心以謀慮祭事以具服物者以備具衣服及祭物以治百事者謂齊前後凡治百衆之事行必思如懼不及愛然者言孝子色必溫
和行必戰恐其形貌如似畏懼不及見親之所愛然止
由如是言心貌必溫身必誦者言孝子設奠及醑之時
容貌溫 and 身形必卑誦如語焉而未之然者如以語語
白於親而未之見報答者宿者皆出者謂助祭所宿之
賓今祭事已畢並皆出去孝子其立卑柔靜默然後以
正定心意以思念其親如似將不復見顏色出然及祭
之後陶陶遂遂如將復入然者孝子思念親深及至祭
後想像親來形貌陶陶遂遂如似親將復反更入然是
故慈善不違身者以孝子思念親深為是之故精慈純

善之故行不違離於身言恒慤善也耳目不違心者言
中心思慮不違於親無時歇也結諸心者言思念深結
精於心形諸色思念其親但徧循述而省視之者術述
省視也言思念其親但徧循述而省視之反覆不忘也
此乃孝子思
念親之志也

建國之神位右社稷而左宗廟注周尚左也疏

正義曰
此一節

明神位所在周人尚左故宗廟在左社稷在右案桓二
年取郕大鼎納於大廟何休云質家右宗廟尚親親文
家右社稷上尊尊此說與
鄭合故鄭云周尚左也

禮記注疏卷四十八

禮記注疏卷四十八考證

古者天子諸侯必有公桑蠶室○

臣召南

按公桑蠶室

在北郊內宰注云婦人以純陰為尊是與藉田之在南郊陰陽相對之義也故祭統曰天子親耕於南郊以共齊盛王后蠶於北郊以共純服又按天子藉田在南郊諸侯在東郊后及夫人之公桑蠶室並在北郊此禮說也何休公羊傳注乃謂天子親耕東田千畝諸侯百畝后夫人親西郊采桑又似藉田並在東

郊公桑並在西郊者蓋何說未可為典要也

歲既單矣注○方慤曰自去歲蠶成之後迄今期歲矣
若孟夏稱麥秋亦此之意

古之獻繭者其率用此與注問者之辭○

臣召南

按此

二句是東上語注謂問者之辭非也

疏則夫人唯一人世婦之吉者○按唯一人之下脫
而曰三宮夫人六字各本俱誤

仁者仁此者也疏言欲行仁者先仁恩於此孝也○按

此十二字並衍文當以下各段疏例之

祀先賢於西學注周小學也疏則於西郊也○方慤曰

先賢則樂祖是也西學則瞽宗是也樂祖有道德者

故曰教諸侯之德

臣召南

按方說是周兼四代之學

其右學即瞽宗在太學之西故曰西學耳何必以西郊之小學為解乎哉

三命不齒注疏今案儀禮云云○

臣召南

按此疏當合

周禮黨正賈疏觀之

建國之神位右社稷而左宗廟疏何休云質家右宗廟
云云。臣召南按恐是三代通禮左為陽右為陰賞
于祖戮于社自夏后氏已然矣何休之說未足據也

禮記注疏卷四十八考證

禮記注疏卷四十九

漢鄭氏注

唐陸德明音義

孔穎達疏

祭統

凡治人之道莫急於禮禮有五經莫重於祭注禮有五
經謂吉禮凶禮賓禮軍禮嘉禮也莫重於祭謂以吉禮

為首也大宗伯職曰以吉禮事邦國之鬼神祇音義

五經

吉凶軍賓嘉之五禮祇祈之反

夫祭者非物自外至者也自中出生於

心也心怵而奉之以禮是故唯賢者能盡祭之義注怵

感念親之貌也怵或為述音義

怵救律反

疏

正義曰此一節總明祭事但祭

禮既廣其事又多記者所說各有部分今各隨文解之此一節明祭祀於禮中最重唯賢者能盡祭義凡祭為禮之本禮為人之本將明禮本故先說治人言治人之道於禮最急禮有五經者經者常也言吉凶賓軍嘉禮所常行故云禮有五經五經之中於祭更急上說人以禮為急此說祭為急者索大宗伯吉禮之別十有二凶禮之別五賓禮之別八軍禮之別五嘉禮之別六五禮之別總三十有六夫祭者非物自外至者也自中出生於心也者自猶從也言孝子祭親非假他物從外至於身使已為之但從孝子身中出生於孝子之心也心怵而奉之以禮者言孝子感時心中怵惕而奉親以祭祀之禮是故唯賢者能盡祭之義者言非賢者不能怵

惕怵惕之義唯必賢
人故能盡恭敬祭

賢者之祭也必受其福非世所謂福也福者備也備者
百順之名也無所不順者之謂備言內盡於已而外順
於道也忠臣以事其君孝子以事其親其本一也注世
所謂福者謂受鬼神之祐助也賢者之所謂福者謂受
大順之顯名也其本一者言忠孝俱由順出也音義
又上則順於鬼神外則順於君長內則以孝於親如此
之謂備唯賢者能備能備然後能祭是故賢者之祭也

致其誠信與其忠敬奉之以物道之以禮安之以樂參之以時明薦之而已矣不求其為此孝子之心也注明

猶潔也為謂福祐為己之報音義

長丁犬反下所長同道音導其為于偽反

注為謂同
一音如字

祭者所以追養繼孝也孝者畜也順於道不

逆於倫是之謂畜注畜謂順於德教音義

養羊尚反下同畜許六反

下疏

正義曰此一節明祭祀受福是百順之理非世所同疏謂福也者言世人謂福為壽考吉祥祐助於身若

賢者受福身外萬事皆順於道理故云非世所謂福也福者備也備者百順之名也無所不順者之謂備此是賢者之福謂內盡其心外極其禮內外俱順於祭具也言內盡於已而外順於道也者釋百順之義也謂心既

內盡貌又外順此之行善無違於道理也其本一也者
言忠臣事君孝子事親其本皆從順而來故云其本一
也上則順於鬼神者廣大順也體尊故云上也外則順
於君長者謂朝廷也出事公卿故云外也不求其為者
言孝子但內盡孝敬以奉祭祀不求其鬼神福祥為己
之報案少牢嘏辭云皇尸命工祝承致多福無疆子女
孝孫侯女受祿於天宜稼於田則是祭祀有求此云不
求者謂孝子之心無所求也但神自致福故有受祿于
天之言若水旱災荒禱祭百神則有求也故大祝有六
祈之義大司徒有荒政索鬼神之禮追養繼孝也者養
者是生時養親孝者生時事親今既沒設禮祭之追
生時之養繼生時之孝孝者畜也者畜謂畜養謂孝子
順於德教不逆於倫理可以畜養其親故釋孝為畜此
據援神契庶人之孝曰畜五孝不同庶人但取畜養而
已不能百事皆順援神契又云天子之孝曰就諸侯曰
度大夫曰譽士曰究庶人曰畜分之則五總之曰畜皆

是畜養但功
有小大耳

是故孝子之事親也有三道焉生則養沒則喪喪畢則祭養則觀其順也喪則觀其哀也祭則觀其敬而時也盡此三道者孝子之行也注沒終也音義

盡徐子忍反下同行下益

反疏正義曰此一節明孝子事親有三種之道

既內自盡又外求助昏禮是也故國君取夫人之辭曰請君之玉女與寡人共有敝邑事宗廟社稷此求助之本也注言玉女者美言之也君子於玉比德焉音義

取七

注切夫祭也者必夫婦親之所以備外內之官也官備則

具備注具謂所供衆物音義

共音恭下文以共皆同

水草之菹陸

產之醯小物備矣三牲之俎八簋之實美物備矣昆蟲之異草木之實陰陽之物備矣注水草之菹芹茹之屬陸產之醯蜺蛭之屬天子之祭八簋昆蟲謂溫生寒死之蟲也內則可食之物有蜩范草木之實菱芡榛栗之

屬音義

芹其斤反茹音卯蜺文之反蛭悅專反蜩音條菱本亦作菱又音陵芡音儵榛側巾反

疏

正義曰此一節以上文孝子事親先能自盡又外求伉儷共寢盛之事注正義曰云水草之菹芹茹之屬者案

醢人云加豆之實芹菹兔醢朝事之豆茆菹麋醢是芹
茆也又有朝事之豆昌本麋醢加豆之實有深蒲醢醢
落菹鴈醢荀菹魚醢其昌本深蒲落荀是水草故云之
屬云陸產之醢蛭蝓之屬者案醢人饋食之豆蜃蛭蝓
即蛭之類醢人加豆之實有兔醢又有醢醢皆是陸產
故云之屬云天子之祭八簋者明堂位云周之八簋又
特牲士兩敦少牢四敦則諸侯六故天子八云內則可
食之物有蜩范者蜩蟬也范蜂也昆蟲之屬云草木之
實菱芡榛栗之屬者案籩人加籩之實有菱
芡饋食之籩有榛栗榛實是草木故云之屬

凡天之所生地之所長苟可薦者莫不咸在示盡物也
外則盡物內則盡志此祭之心也注咸皆也是故天子
親耕於南郊以共齊盛王后蠶於北郊以供純服諸侯

耕於東郊亦以共齊盛夫人蠶於北郊以共冕服天子諸侯非莫耕也王后夫人非莫蠶也身致其誠信誠信之謂盡盡之謂敬敬盡然後可以事神明此祭之道也

注純服亦冕服也互言之爾純以見繒色冕以著祭服

東郊少陽諸侯象也夫人不蠶於西郊婦人禮少變也

齊或為粢音義

齊盛本亦作粢與粢同音咨下及注同純側其反注及下純冕同見賢通反少

詩召

疏

正義曰此一經總結上文既內自盡外又求助

反

祭之事苟可薦者悉在祭用故云示盡物也則

上陰陽之物備矣外則盡物內則盡志此祭之心也者此是孝子祭親之心是故天子親耕於南郊以共齊盛

王后蠶於北郊以共純服者此履結上文也必夫婦親之及盡物盡志之事祭須盡物志故人君夫人各竭力從事於耕蠶也鄭云王藉田在遠郊故甸師氏掌之內宰云中春詔后帥內外命婦始蠶於北郊注云婦人以純陰為尊故也純服者亦冕服也純以見繒色冕以著祭服諸侯耕於東郊亦以共齊盛者天子太陽故南也諸侯少陽故東也然藉田並在東南故王言南諸侯言東夫人蠶於北郊以共冕服者后太陰故北夫人少陰故合西郊然亦北者婦人質少變故與后同也天子諸侯非莫耕也王后夫人非莫蠶也者莫無也王后豈貧無穀帛而夫婦自耕蠶乎其有以也身致其誠信誠信之謂盡是所以其欲致誠信故身自親之盡之謂敬敬盡然後可以事神明者祭盡敬則乃是盡也此祭之道結上文也注正義曰純服亦冕服也者天子云純諸侯言冕冕祭服故知純亦是祭服天子言衣色諸侯亦有衣色是其互也鄭氏之意凡言純者其義有二一緣

傍才是古之緇字一是絲傍屯是純字但書文相亂雖是緇字並皆作純鄭氏所注於絲理可知於色不明者即讀為緇即論語云今也純儉及此純服皆讀為黑色若衣色見絲文不明者讀純以為絲也

及時將祭君子乃齊齊之為言齊也齊不齊以致齊者也是故君子非有大事也非有恭敬也則不齊不齊則於物無防也者欲無止也及其將齊也防其邪物訖其者欲耳不聽樂故記曰齊者不樂言不敢散其志也心不苟慮必依於道手足不苟動必依於禮注訖猶止也

音義

乃齊側皆反本又作齊下不齊齊者同言齊也齊不齊並如字下以齊之同者市志反邪似嗟反訖

居乙反

是故君子之齊也專致其精明之德也故散齊七

日以定之致齊三日以齊之定之之謂齊齊者精明之

至也然後可以交於神明也注定者定其志意是故先

期旬有一日宮宰宿夫人夫人亦散齊七日致齊三日

注宮宰守官官也宿讀為肅肅猶戒也戒輕肅重也音

義

先悉薦反
又如字

君致齊於外夫人致齊於內然後會於大

廟君純冕立於阼夫人副褱立於東房君執圭瓚裸尸

大宗執璋瓚亞裸及迎牲君執紉卿大夫從士執芻宗

婦執盥從夫人薦浼水君執鸞刀羞濟夫人薦豆此之
謂夫婦親之注大廟始祖廟也圭瓚璋瓚裸器也以圭
璋為柄酌鬱鬯曰裸大宗亞裸容夫人有故攝焉紂所

以牽牲也周禮作紛芻謂藁也殺牲時用薦之周禮封
人祭祀飾牲共其水藁浼盥齊也盥齊浼酌也凡尊有
明水因兼云水爾濟濟肺祭肺之屬也君以鸞刀割制
之天子諸侯之祭禮先有裸尸之事乃後迎牲芻或為

芻音義

大廟音泰下大廟皆同禕音輝瓚才旦反裸古
亂反紂直忍反注同徐以忍反從才用反下皆

同芻初俱反盥烏浪反注同從夫人絕句一讀以從字
絕句說舒銳反徐音歲蓋齊本亦作齊才細反注同柄
兵命反絳直忍反藎苦老反下同
共音恭盥齊才細反下盥齊同
疏正義曰此一節明

將祭齊戒之義并

明君與夫人皆致齊會於大廟夫婦交親行祭之義及

時將祭君子乃齊者謂四時應祭之前未旬時也方將
接神先宜齊整身心故齊也齊不齊以致齊者也言齊
者齊也所以正此不齊之事謂未齊之時心慮散蕩心
所者欲有不齊正及其齊也正此不齊之事以致極齊
戒之道君致齊於外夫人致齊於內者外謂君之路寢
內謂夫人正寢是致齊並皆於正寢其實散齊亦然但
此文對會於大廟故云君致齊於外夫人致齊於內耳
然後會於大廟者祭日君與夫人俱在大廟之中廟即
始祖廟也君純冕立於阼者純亦緇也上文已解故鄭
於此畧而不論冕皆上玄下纁其服顯然故通云緇冕
若非二王之後及周公廟即悉用玄冕而祭夫人副褱

立於東房者副及禕后之上服魯及二王之後夫人得服之侯伯夫人揄狄子男夫人闕狄而並立東房以俟行事尸既入之後轉就西房故禮器云夫人在房雖不云東西房下云夫人東酌壘尊則知夫人在房謂西房也大宗執璋璣亞裸者大宗主宗廟禮者以亞裸之禮夫人親為之此不云夫人而云大宗者記者廣言容夫人有故故大宗伯代夫人行禮執璋璣亞裸之禮圭璣璋璣並是裸器也以圭璋為柄酌鬱鬯曰裸也君執紼者紼牛鼻繩君自執之入繫於碑卿大夫從者謂卿大夫從驅之及殺與幣告也皆從於君士執芻者芻謂藁也以其殺牲用芻藁藉之宗婦執盥從者謂同宗之婦執盥以從夫人夫人薦浣水者浣即盥齊由自濁用清酒以浣沛之浣水是明水宗婦執盥齊從夫人而來奠盥齊於位夫人乃就盥齊之尊酌此浣齊而薦之者因盥齊有明水連言水耳上云夫人副禕此則上公之祭宜有醴齊盥齊但言盥者畧言之亦容侯伯子男之祭

但有盞齊無醴齊也故執盞從君執鸞刀羞齊者齊肝肺也齊有二時一是朝踐之時取肝以膋貫之入室燎於鑪炭出薦之主前二是謂饋熟之時君以鸞刀割制所羞齊肺橫切之使不絕亦奠於俎上尸並齊之故云羞齊一云羞進也謂君用鸞刀制此齊肉以進之故云鸞刀羞齊夫人薦豆者於君羞齊之時夫人薦此饋食之豆此之謂夫婦親之者君親執紼及鸞刀羞齊是夫親之也夫人薦說水及羞豆是婦親之也故云夫婦親之注正義曰大宗亞裸容夫人有故攝焉者解大宗所以亞裸之義案此下云夫人薦說水及薦豆則是夫人親行而云夫人有故者記者亂陳言大宗亞裸容夫人有故之時下云夫人薦盞薦豆顯夫人親行其事各有所明不可一揆云盞齊說酌也者周禮司尊彝文案彼注云盞齊羞清和以清酒沛之謂之說酌鄭引此者解經夫人薦說水是盞齊也云凡尊有明水因魚云水爾者以經夫人薦說祇是薦盞不薦明水今經薦說之下別

更言水此謂明水也以盞齊加明水故記者因盞而連言明水爾知盞齊加明水者郊特牲云祭齊加明水是也云齊齊肺祭肺之屬也者案少牢特牲薦熟之時俎有祭肺及舉肺切之舉肺離而不提心二肺皆齊之故云齊肺祭肺之屬云天子諸侯之祭禮先有裸尸之事乃後迎牲者以特牲少牢無此禮今此經裸後有迎牲之文是天子諸侯之事故鄭明之也

及入舞君執干戚就舞位君為東上冕而總干率其羣臣以樂皇尸是故天子之祭也與天下樂之諸侯之祭也與竟內樂之冕而總干率其羣臣以樂皇尸此與竟內樂之之義也注君為東上近主位也皇君也言君尸

者尊之音義

以樂音洛下同竟音境
篇內皆同近附近之近
疏正義曰此一經
明祭時天子諸

侯親在舞位

以樂皇尸也

夫祭有三重焉獻之屬莫重於裸聲莫重於升歌舞莫
重於武宿夜此周道也注武宿夜武曲名也周道猶周

之禮音義

獻之屬莫重於裸
一本無之屬二字

凡三道者所以假於外而

以增君子之志也故與志進退志輕則亦輕志重則亦
重輕其志而求外之重也雖聖人弗能得也是故君子
之祭也必身自盡也所以明重也道之以禮以奉三重

而薦諸皇尸此聖人之道也疏

正義曰此一節并明祭祀之禮有三種可重之

事舞莫重於武宿夜者武宿夜是武曲之名是衆舞之中無能重於武宿夜之舞皇氏云師說書傳云武王伐紂至於商郊停止宿夜士卒皆歡樂歌舞以待旦因名爲武宿夜其樂亡也熊氏云此即大武之樂也凡三道者所以假於外而以增君子之志也者言三種所重之道皆假借外物而以增益君子內志裸則假於鬱鬯歌則假於聲音舞則假於干戚皆是假於外物故與志進退者此外物增成君子內志故與志同進同退若內心志輕畧則此等亦輕畧內志殷重此等亦殷重

夫祭有餼餼者祭之末也不可不知也是故古之人有言曰善終者如始餼其是已是故古之君子曰尸亦餼

鬼神之餘也惠術也可以觀政矣注術猶灋也為政尚

施惠盡美能知能惠詩云維此惠君民人所瞻音義

道

音導餽音浚施惠始豉反
下文注並同能知音智

是故尸謏君與卿四人餽君

起大夫六人餽臣餽君之餘也大夫起士八人餽賤餽

貴之餘也士起各執其具以出陳于堂下百官進徹之

下餽上之餘也注進當為餽聲之誤也百官謂有事於

君祭者也既餽乃徹之而去所謂自卑至賤進徹或俱

為餽音義

謏所六反起也百官進依注
作餽卑如字隱義音必利反

凡餽之道每變

以衆所以別貴賤之等而興施惠之象也是故以四簋

黍見其脩於廟中也廟中者竟內之象也注鬼神之惠

徧廟中如國君之惠徧竟內也音義

別彼列反下同見賢遍反下同脩於

一本脩作徧
徧音遍下同

祭者澤之大者也是故上有大澤則惠必

及下顧上先下後耳非上積重而下有凍餒之民也是

故上有大澤則民夫人待于下流知惠之必將至也由

餒見之矣故曰可以觀政矣注鬼神有祭不獨饗之使

人餒之恩澤之大者也國君有蓄積不獨食之亦以施

惠於竟內也音義

重直龍反下同餒乃罪反夫音疏正義

曰此一節明祭末餒餘之禮自求多福恩澤廣被之事是故古之人有言曰善終者如始餒其是已者引古人之言證餒為美也夫靡不有初鮮克有終而祭之有餒則是克有終而禮猶盛故云善終者如始餒其是已已語辭也是故古之君子曰尸亦餒鬼神之餘也者又引古言證餒義也言亦者亦人餒尸之餘乃是人食尸餘而云尸亦餒鬼神餘者若王侯初薦毛血燔燎是薦于鬼神至薦熟時尸乃食之是尸餒鬼神之餘若大夫士陰厭亦是先薦鬼神而後尸乃食亦尸餒鬼神餘故并云尸亦餒鬼神之餘也惠術也可以觀政矣者術猶灋也尸餒鬼神之餘是施恩惠之術灋言為政之道貴在施惠可以觀省人君之政教能施恩惠者即其政善不能施恩惠者則其政惡故云可以觀政矣臣餒君之餘也者以君於廟中事尸如君則君為臣禮君食尸餘是

臣食君餘與大夫食君餘相似故云臣餞君之餘也諸侯之國有五大夫此云六者兼有采地助祭也以下漸徧及下示溥恩惠也士起各執其具以出陳于堂下者士廟中餞訖而起所司各執其饌具以出廟戶陳于堂下百官進徹之者進當為餞謂有祭事之百官餞訖各徹其器而乃去之凡餞之道每變以衆所以別貴賤之等者初君與卿四人次大夫六人次士八人是變以衆加之以兩是別貴賤之等而與施惠之象也者興起也其餞之禮初餞貴而少後餞賤而多皆先上而後下施惠之道亦當然皆先貴後賤故云施惠之象是故以四簋黍見其脩于廟中也者謂餞之時君與二卿以四簋之黍脩整普徧也所以用四簋多黍而餞者欲見其恩惠脩整徧於廟中諸侯之祭有六簋今云以四簋者以二簋留為陰厭之祭故以四簋而餞簋有黍稷特云黍者見其美舉黍稷可知也廟中者竟內之象也者以四簋而徧廟中如君之恩惠徧於竟內也顧上先下後耳

者言上有大澤惠必及下無不周徧但瞻顧之時尊上者在先卑下者處後耳一云顧故也謂君上先餽臣下後餽示恩則從上起也非上有積重而下有凍餒之民也者言非是在上有財物積重而不以施惠而使在下有凍餒之民言有積重必施散在下不使凍餒由餽見之矣者言民所以知上有財物恩惠及於下者祇祭祀之餽見其恩逮於下之理故曰可以觀政矣者餽若以禮則能施惠其政善也餽若不以禮則不能施惠其政惡也故云可以觀政矣

夫祭之為物大矣其興物備矣順以備者也其教之本

與注為物猶為禮也興物謂薦百品音義

與音餘下是與同

是

故君子之教也外則教之以尊其君長內則教之以孝

於其親是故明君在上則諸臣服從崇事宗廟社稷則

子孫順孝盡其道端其義而教生焉注崇猶尊也音義

長丁犬反下
長幼皆同

是故君子之事君也必身行之所不安於

上則不以使下所惡於下則不以事上非諸人行諸已

非教之道也注必身行之言恕已乃行之音義

惡烏路反

是

故君子之教也必由其本順之至也祭其是與故曰祭

者教之本也已注教由孝順生也疏

正義曰此一節明祭祀禮備具內外

俱兼脩之於已然後及物是為政之本夫祭之為物大矣者物謂事物物大言祭之為物盛大矣以所行皆依

禮故為大其興物備矣者謂庶羞之屬言興造庶羞百
品皆足故興物備矣順以備者也其教之本與者祭必
依禮是順也百品皆足是備也若能上下和順物皆備
具是為教之本言聖人設教唯以順以備故云其教之
本與是故君子至其親者祭既順備可為教故人君因
為教焉外教謂郊天內教謂孝於親祭宗廟是故明君
至順孝者由君外教尊君長故諸臣服從內教孝於親
故子孫順孝盡其道端其義而教生焉者謂人君身自
行之盡其事上之道又端正君臣上下之義則政教由
此生焉所不安於上則不以使下者謂在上所為之事
施之於己己所不安則不得施於下所惡於下則不以
事上者在下有不善之事施於己己所憎惡則不得以
此事於上以上憎惡也非諸人行諸己非教之道也者
結上二事諸於也謂他人行此惡事加於己己以為非
是非於人已乃行此惡事而施人是行於己也若如此
非政教之道言為政教必由於己乃能及物故下云必

由其本順
之至也

夫祭有十倫焉見事鬼神之道焉見君臣之義焉見父
子之倫焉見貴賤之等焉見親疎之殺焉見爵賞之施
焉見夫婦之別焉見政事之均焉見長幼之序焉見上
下之際焉此之謂十倫注倫猶義也音義見事賢遍反
下皆同殺色
界反徐所疏正義曰此一節廣明祭有十種倫禮今各
例反下同隨文解之從此至此之謂十倫一經總明
十倫之目從上雖云祭其事隱此廣
陳祭舍十義以顯教之本十倫義也

鋪筵設同几為依神也詔祝於室而出于祊此交神明

之道也注同之言詞也祭者以其妃配亦不特几也詔

祝告事於尸也出于祊謂索祭也音義

鋪普胡反又芳夫反筵羊然反

為予偽反下注為其皆同祊伯更反詞徒貢反索所伯反

疏正義曰此一節明第一

同几者設之曰筵坐之曰席同之言詞詞共也言人生時形體異故夫婦別几死則魂氣同歸於此故夫婦共几鋪席設几使神依之設此夫婦所共之几席亦共之必云同几者筵席既長几則短小恐其各設故特云同几詔祝於室者詔告也祝祝也謂祝官以言詔告祝請其尸於室求之而出于祊者謂明日繹祭而出廟門旁廣求神於門外之祊此交神明之道也者神明難測不可一處求之或門旁不敢定是求神明交接之道鬼神通故云道注正義曰同之言詞也者若單作同字是齊同之同非詞共之詞所以物有異類而同時也則同死

同生同出同入之類不齊其物異也若詞共之詞則言
旁作同故古文字林皆訓詞為共是漢魏之時字義如
此是以讀同為詞今則總為一字云祭者以其妃配者
儀禮少牢文謂祭夫祝辭云以某妃配云亦不特几也
者謂不但特設辭亦不特設其几謂祝辭與几皆同
於夫不特設也故鄭注同几筵云祭於廟同几精氣合
也云詔祝告事於尸也者謂灌鬯饋熟醕尸之等祝官
以祝辭告事於尸其事廣也以總論事神故廣言之知
非朝踐之時血毛詔於室者以朝踐尸主皆在戶外斂
時之事非終始事神之道故知非也云出於祊謂索祭
也者案郊特牲索祭祝
於祊故云謂索祭也

君迎牲而不迎尸別嫌也尸在廟門外則疑於臣在廟
中則全於君君在廟門外則疑於君入廟門則全於臣

全於子是故不出者明君臣之義也注不迎尸者欲全

其尊也尸神象也鬼神之尊在廟中人君之尊出廟門

則伸音義

伸音申

疏

正義曰此經明第二倫君臣之義也君迎牲不迎尸別嫌也者尸體既尊

君宜自卑若出迎尸尸道未伸則嫌君猶欲自尊之義也尸在廟門外則疑於臣者則解別嫌事也尸本是臣而為尸時則尊在廟中君若未入廟其尊未伸君若出迎則疑尸有還為臣之道故云疑於臣也在廟中則全於君者尸若入廟則君父道全也唯云全君不云全父者此本是明君臣故畧於全父也下既云臣子故知此為君父也自廟中行禮尸皆答拜然父無答子之禮君有答臣之瀋故據君言之耳君在廟門外則疑於君者釋君疑也君道之全全在廟門外若出門外則君道還尊與平常不異故不出門也入廟門則全於臣全於子

者君若入廟則臣子道全無所疑也是故不出者明君臣之義也者結第二倫也君至尊而受屈廟中以臣子自處不敢出廟門恐尸尊不極欲示天下咸知君臣之義也君臣由義而合故云義也

夫祭之道孫為王父尸所使為尸者於祭者子行也父北面而事之所以明子事父之道也此父子之倫也注

子行猶子列也祭祖則用孫列皆取於同姓之適孫也

天子諸侯之祭朝事延尸於戶外是以有北面事尸之

禮音義

行尸劉反注同徐胡孟反適丁歷反

疏

正義曰此第三倫明父子之理孫為王父尸者謂王

父之孫行與王父作尸所使為尸者於祭者子行也者謂孝子所使令為尸者於祭者孝子身為子之行秩也

父北面而事之者父則祭者之身北面而事子行之尸也所以明子事父之道也此父子之倫也者主人為欲孝敬已父不計己尊而北面事子行則凡為子者豈得不自尊事其父乎是見子事父之道也注正義曰天子諸侯之祭朝事延尸於戶外者以少牢特牲尸皆在室之奧主人西面事之無北面事尸之禮故知是天子諸侯也知當朝事者以郊特牲詔祝於室坐尸於堂詔祝於室當朝事之節故知坐尸於堂當朝事也

尸飲五君洗玉爵獻卿尸飲七以瑤爵獻大夫尸飲九以散爵獻士及羣有司皆以齒明尊卑之等也注尸飲

五謂醕尸五獻也大夫士祭三獻而獻賓音義

瑤音遙散悉但

反差本又作之等醕音肩又士近反

疏正義曰此一節明第四倫尊卑差等尸飲五君洗玉爵獻卿至皆以

齒明尊卑之等者謂獻卿大夫士及有司等其爵雖同皆長者在先故云皆以齒注正義曰此據備九獻之禮者至主人醕尸故尸飲五也凡祭二獻裸用鬱鬯尸祭奠而不飲朝踐二獻饋食二獻及食畢主人醕尸此等皆尸飲之故云尸飲五於此之時以獻卿獻卿之後乃主婦醕尸醕尸畢賓長獻尸是尸飲七也乃瑤爵獻大夫是正九獻禮畢但初二裸不飲故云尸飲七自此以後長賓兄弟更為加爵尸又飲二是并前尸飲九主人乃散爵獻士及羣有司也此謂上公九獻故以醕尸之一獻為尸飲五也若侯伯七獻朝踐饋食時各一獻食訖醕尸但飲三也子男五獻食訖醕尸尸飲一云大夫士祭三獻而獻賓者欲明諸侯獻賓時節與大夫士獻賓不同知大夫士祭三獻而獻賓者特牲禮文下大夫不賓尸與士同亦三獻而獻賓知者有司徹文其上大夫別行賓尸之禮與此異也

夫祭有昭穆昭穆者所以別父子遠近長幼親疎之序而無亂也是故有事於大廟則羣昭羣穆咸在而不失其倫此之謂親疎之殺也注昭穆咸在同宗父子皆來

音義

昭止遙反後放此

疏

正義曰此一節明第五倫也親疎之殺也昭穆謂尸主行列於廟中所以

至無亂者謂父南面子北面親者近疏者遠又各有次序是故有事於大廟則羣昭羣穆咸在者祭大廟之時則衆廟尸主皆來及助祭之人同宗父子皆至則羣昭穆咸在若不於大廟餘廟之祭唯有當廟尸主及所出之廟子孫來至不得羣昭羣穆咸在也而不失其倫者尸主既有昭穆故主人及賓衆亦為昭穆列在廟不失倫類此之謂親疎之殺也者殺漸也列昭穆存亡各有遠近示天下親疎有漸也

古者明君爵有德而祿有功必賜爵祿於大廟示不敢
專也故祭之日一獻君降立于阼階之南南鄉所命北
面史由君右執策命之再拜稽首受書以歸而舍奠于
其廟此爵賞之施也注一獻一醕尸也舍當為釋聲之

誤也非時而祭曰奠音義

鄉許亮反舍依注音釋

疏

正義曰此一節明第六倫

也爵賞之施焉爵有德而祿有功者爵表德故云有德
祿賞功故云有功也而舍奠于其廟者謂受策命卿大
夫等既受策書歸還而釋奠於家廟告以受君之命以
非時而祭故稱奠此爵賞之施也者君尊尚爵賞於廟
不自專故民知施必由尊也注正義曰經云一獻知非
初祿及朝踐饋食之一獻必為一醕尸者以一醕尸之

前皆為祭事承奉鬼神未暇策命而尸食已畢祭事方了始可以行其爵賞及賜勞臣下此一獻則上尸飲五君獻卿之時也若天子命羣臣則不因常祭之日特假於廟故大宗伯云王命諸侯則饋注云王將出命假祖廟立依前南鄉是也

君卷冕立于阼夫人副褱立于東房夫人薦豆執校執醴授之執鐙尸酢夫人執柄夫人授尸執足夫婦相授受不相襲處酢必易爵明夫婦之別也注校豆中央直者也執醴授醴之人授夫人以豆則執鐙鐙豆下附也

音義

卷古本反校尸教反又尸交反柄也鐙音登又丁鄧反

疏

正義曰此一節明第七倫也夫人副

禘立于東房者此謂上公之夫又故副禘立于東房若其餘夫人則不副禘也夫人薦豆執校者校謂豆之中央直者夫人薦豆之時手執此校執醴授之執鐙者鐙謂豆下跗夫人薦豆之時此執醴之人以豆授夫人之時則執豆之下跗夫人受之乃執校也尸酢夫人執柄者爵為雀形以尾為柄夫人獻尸尸酢夫人尸則執雀尾授夫人也夫人授尸執足者夫人受酢於尸則執爵足也夫婦相授受不相襲處者謂夫婦交相致爵之時襲因也其執之物不相因故處若夫婦交相致爵不能執故處以明男女有別酢必易爵也謂夫婦交相致爵之時主人受主婦之酢易換其爵故特牲主人受主婦之酢爵更爵酢鄭注云主人更爵自酢男子不承婦人爵即引此文云夫婦相授受不相襲處酢必易爵也皇氏云夫婦猶男女不相襲處則上執校執鐙之屬違鄭注儀禮之文其義非也注正義曰謂夫人獻尸以醴齊之時此人酌醴以授夫人至夫人薦豆之時此人又執

豆以授夫人是獻之與薦皆此人所掌故云執醴授醴之人執鐙謂授夫人以豆而執鐙也

凡為俎者以骨為主骨有貴賤殷人貴髀周人貴肩凡前貴於後俎者所以明祭之必有惠也是故貴者取貴骨賤者取賤骨貴者不重賤者不虛示均也惠均則政行政行則事成事成則功立功之所以立者不可不知也俎者所以明惠之必均也善為政者如此故曰見政事之均焉注殷人貴髀為其厚也周人貴肩為其顯也凡前貴於後謂脊脅臂臑之屬音義

髀必氏反又必履反重直龍反臑乃

報反肱骨也

疏

正義曰此一經明第八倫也凡為俎者以骨為主者俎為助祭者各將物於俎也殷人貴

髀周人貴肩者殷質貴髀之厚賤肩之薄周文貴肩之顯賤髀之隱各隨所貴凡前貴於後者據周言之以周人之貴肩故也俎者所以明祭之必有惠也者助祭者故賜之俎也貴者不重賤者不虛示均也者言貴者不特多而重賤者不虛而無分俎多少隨其貴賤是示均平也功之所以立者不可不知也者言功立由於分俎其事既重人君不可不知分俎之事也善為政者如此者言人君欲善為政教者必須如此分俎均平注正義曰此脊脅臂臑舉其貴者言之屬中包其賤者不云肩者以經云周人貴肩故此略之前體臂臑為貴後體膊胛為賤就脊脅之中亦有貴賤正脊在前為貴胛脊橫脊在後為賤脊則正脅在前為貴短脅為賤故總云之屬以色之

凡賜爵昭為一穆為一昭與昭齒穆與穆齒凡羣有司皆以齒此之謂長幼有序注昭穆猶特牲少牢饋食之禮衆兄弟也羣有司猶衆賓下及執事者君賜之爵謂

若酬之疏

正義曰此一節明祭之第九倫長幼之序凡賜爵者爵酒爵也謂祭祀旅酬時賜助祭者

酒爵故云賜爵昭為一穆為一此言君衆兄弟子孫等在昭列者則為一色在穆列者自為一色各自相旅尊者在前卑者在後若同班列則長者在前少者在後是昭與昭齒穆與穆齒注正義曰案特牲饋食禮初有主人獻衆賓兄弟之禮後乃旅酬衆賓兄弟此經直云賜爵知非獻時而特云酬者以獻時不以昭穆為次者此云昭與昭齒穆與穆齒當旅酬之事故知賜爵為酬

夫祭有畀煇胞翟闇者惠下之道也唯有德之君為能
行此明足以見之仁足以與之畀之為言與也能以其
餘畀其下者也煇者甲吏之賤者也胞者肉吏之賤者
也翟者樂吏之賤者也闇者守門之賤者也古者不使
刑人守門此四守者吏之至賤者也尸又至尊以至尊
既祭之末而不忘至賤而以其餘畀之是故明君在上
則竟內之民無凍餒者矣此之謂上下之際注明足以
見之見此卑者也仁足以與之與此卑者也煇周禮作

韞謂韞磔皮革之官也翟謂教羽舞者也古者不使刑

人守門謂夏殷時音義

界必利反下及注同與也輝依注作韞同况萬反又音運下同

甲吏也胞步交反下同肉吏也翟音狄樂吏也闇音昏

守門者也

以見賢遍反注皆同此卑如字舊必利反下同磔知

宅反

疏

正義曰此一節明祭之第十倫也夫祭有界輝胞翟闇者惠下之道也者界與也輝也胞

也翟也闇也此四者皆是賤官於祭之末與此四者以

恩賜是惠施之道也明足以見之者謂有德之君德能

昭明足以見其惠下之義仁足以與之者以君有仁恩

足能賜與於下古者不使刑人守門者此作記之人以

見周刑人守門於祭末又何恩賜與刑人故明之云古

者夏殷之時不使刑人守門雖是賤人所以得恩賜此

四守者吏之至賤者也既每言賤明但是各守其職之

人能為四物故云四守也尸又至尊以至尊既祭之末

而不忘至賤而以其餘畀之是故明君在上則竟內之民無凍餒者矣者更廣明既有餘分與至賤為恩之深也人君身尊而尸又更尊故言又也此之謂上下之際者結十倫也際接也至尊與賤者其道接也注正義曰案周禮考工記鞀人為皋陶鄭云皋陶鼓木也言鞀人之官掌作鼓木張皮兩頭鞀之以為鼓是鞀磔皮革之官云翟謂敎羽舞者也者羽翟羽故詩邶風云左手執籥右手秉翟翟即狄也古字通用云古者不使刑人守門謂夏殷時者以周禮墨者使守門故知不使刑人守門謂夏殷時也

凡祭有四時春祭曰禘夏祭曰禘秋祭曰嘗冬祭曰烝

注謂夏殷時禮也音義

禘 禘 羊灼反字又作禘夏戶
祭反下注夏者孟夏同

禘 禘

陽義也嘗烝陰義也禘者陽之盛也嘗者陰之盛也故

曰莫重於禘嘗注夏者尊卑著而秋萬物成古者於禘

也發爵賜服順陽義也於嘗也出田邑發秋政順陰義

也注言爵命屬陽國地屬陰故記曰嘗之日發公室示

賞也草艾則墨未發秋政則民弗敢草也注發公室出

賞物也草艾謂艾取草也秋草木成可艾艾給饗亨時

則始行小刑也音義

艾音刈艾所銜反饗七亂反亨普彭反餘普孟反

故曰禘

嘗之義大矣治國之本也不可不知也明其義者君也

能其事者臣也不明其義君人不全不能其事為臣不

全注全猶具也夫義者所以濟志也諸德之發也是故其德盛者其志厚其志厚者其義章其義章者其祭也敬祭敬則竟內之子孫莫敢不敬矣注濟成也發謂機發也竟內之子孫萬人為子孫是故君子之祭也必身親蒞之有故則使人可也雖使人也君不失其義者君明其義故也注蒞臨也君不失其義者言君雖不自親祭祭禮無闕於君德不損也其德薄者其志輕疑於其義而求祭使之必敬也弗可得已祭而不敬何以為民

父母矣疏

正義曰此一節明祭祀之重禘嘗之義人君若能明於其義可以為民父母今各隨文解

之禘者陽之盛也者以禘祭在夏夏為炎暑故為陽盛嘗者陰之盛也者以嘗祭在秋之時陰功成就故為陰盛冬雖嚴寒以物於秋成故不得以冬烝對夏禘故記曰者以記錄之前先有此記之文故作記者載前記之文所以言記曰也此記云嘗祭之日發出公室貨財以示賞也草艾則墨者謂初秋草堪艾給炊爨之時則行小刑之墨未發秋政則民不敢艾草也言夏節雖盡人君未發行秋政則民不敢艾草也夫義者所以濟志也者濟成也言禘嘗之義若人君明之所以成就其志諸德之發也者發謂機發也諸衆也言義者是人君衆德之發謂諸衆人之德發在於義是故其德盛者其志厚者謂人君道德顯盛則念親志意而深厚若能念親深厚則事親祭祀其義章明顯著若能事親章明顯著則其祭也恭敬以此化下則竟內民之子孫無敢不恭敬

其親矣以化於上故也雖使人也君不失其義者君明其義故也言祭祀之時身既有故使人攝之雖使人攝由君能恭敬不喪失於為君之義所以然者由君自明曉於禘嘗之義故也其德薄者其志輕者言人君道淺義薄則其念親志意不能厚重疑於其義至民父母矣者謂志意既輕疑惑於祭祀之義皆不能盡心致敬身既危疑而欲求祭使之必敬不可得已已是語辭注正義曰爵命是生養之事故屬陽國地是土地之事故屬陰案左傳云賞以春夏刑以秋冬此嘗之日發公室示賞者文各有所對以賞對刑則賞屬春夏刑屬秋冬其實四時之間皆有賞故車服屬夏田邑屬秋出田邑之時亦有物也故覲禮秋時賜侯氏車服及篋服也

夫鼎有銘銘者自名也自名以稱揚其先祖之美而明著之後世者也為先祖者莫不有美焉莫不有惡焉銘

之義稱美而不稱惡此孝子孝孫之心也唯賢者能之

注銘謂書之刻之以識事者也自名謂稱揚其先祖之

德著己名於下音義

自名如字徐武政反下及注自名同

銘者論譔其先

祖之有德善功烈勲勞慶賞聲名列於天下而酌之祭

器自成其名焉以祀其先祖者也顯揚先祖所以崇孝

也身比焉順也明示後世教也注烈業也世功曰勲事

功曰勞酌之祭器言斟酌其美傳著於鐘鼎也身比焉

謂自著名於下也順也自著名以稱揚先祖之德孝順

之行也教也所以教後世音義

謨音撰比毘志反謂次比也下及注皆同斟之

林反傳音附徐音賦一音直專反謂傳述著直畧反徐張慮反行下孟反

夫銘者壹稱而上

下皆得焉耳矣是故君子之觀於銘也既美其所稱又

美其所為注美其所為美此人為此銘為之者明足以

見之仁足以與之知足以利之可謂賢矣賢而勿伐可

謂恭矣注明足以見之見其先祖之美也仁足以與之

與其先祖之銘也非有仁恩君不使與之也知足以利

之利己名得比於先祖音義

見賢遍反注同知音智注同

故衛孔悝

之鼎銘曰六月丁亥公假于大廟注孔悝衛大夫也公

衛莊公蒯聵也德孔悝之立已依禮褒之以靜國人自

固也假至也至於大廟謂以夏之孟夏禘祭音義

悝口
回反

假加百反注同蒯苦怪
反蒯五怪反褒保毛反

公曰叔舅乃祖莊叔左右成公

成公乃命莊叔隨難于漢陽即宮于宗周奔走無射注

公曰叔舅者公為策書尊呼孔悝而命之也乃猶女也

莊叔悝七世之祖衛大夫孔達也隨難者謂成公為晉

文公所伐出奔楚命莊叔從焉漢楚之川也即宮於宗

周後反得國坐殺弟叔武晉人執而歸之於京師寘之深室也射厭也言莊叔當奔走至勞苦而不厭倦也周

既去鎬京猶名王城為宗周也音義

左音佐右音又下啓右并注同一讀

此左右並如字難乃旦反奔本又作奔射音亦注同為策初草反女音汝後皆同從才用反坐才臥反寘之豉反厭於豔反下啓右獻公獻公乃命成叔纂乃祖服注

同鎬胡老反

獻公衛侯衍成公曾孫也亦失國得反言莊叔之功流

於後世啓右獻公使得反國也成叔莊叔之孫成子烝鉏也右助也纂繼也服事也獻公反國命成子繼女祖

莊叔之事欲其忠如孔達也音義

蔡子管反衍苦旦反
烝之承反下及注同

鉅仕
居反

乃考文叔興舊者欲作率慶士躬恤衛國其勤公

家夙夜不解民咸曰休哉注文叔者成叔之曾孫文子

圉即惺父也作起也率循也慶善也士之言事也言文

叔能興行先祖之舊德起而循其善事音義

者欲市志
反解古責

反休許蚪反

圍魚呂反

公曰叔舅子女銘若纂乃考服注若乃猶

女也公命惺子女先祖以銘以尊顯之女繼女父之事

欲其忠如文子也成公獻公莊公皆失國得反言孔氏

世有功焉寵之也音義

子羊許反注同

悝拜稽首曰對揚以辟

之注對遂也辟明也言遂揚君命以明我先祖之德也

音義

辟必亦反又婢尺反注同明也

勤大命施于烝彝鼎注施猶著也

言我將行君之命又刻著於烝祭之彝鼎彝尊也周禮

大約劓書於宗彝音義

施如字彝以支反著張慮反又直畧反下同約如字徐於妙反

劓才細反

此衛孔悝之鼎銘也注言銘之類衆多也畧取其

一以言之古之君子論譔其先祖之美而明著之後世

者也以其身以重其國家如此注如莊公命孔悝之

為也莊公孔惺雖無令德以終其事於禮是行之非子
孫之守宗廟社稷者其先祖無美而稱之是誣也有善
而弗知不明也知而弗傳不仁也此三者君子之所恥

也疏

正義曰以前經明事親致敬此一節明稱揚先祖
之美今各依文解之銘者自名也者言為先祖之

銘者自著己之功名於下自名以稱揚其先祖之美而
明著之後世者也謂自著己名之時先稱揚其先祖之
美於上而使昭明顯著於後世銘者論其先祖之有
德善者論謂論說誤則誤錄言子孫為銘論說誤錄其
先祖道德善事功烈勳勞慶賞聲名列於天下者此先
祖美善之事也烈業也謂有功業勳勞有慶賞聲名著
於天下者也而酌之祭器者酌斟酌也祭器鐘鼎也若
有聲名徧普天下者則斟酌列書著於君之鐘鼎也自

成其名焉者先書先祖之德於器上又自成己名於先祖銘下也以祀其先祖者也者祀先祖謂預君祫祭也禮功臣既得銘鼎則得預君大祫令先祖被銘預祫是尊其先祖也顯揚先祖所以崇孝也者釋所以必銘義也為崇於孝道故稱揚先祖也身比焉順也者比次也先稱祖德而已身親自著名次於下是崇孝順之行也明示後世教也者為人子孫能得稱揚先祖明示後世使後世教慕即是教也夫銘者壹稱者謂造銘唯壹稱先祖之善而上下皆得焉耳矣者上謂光揚先祖下謂成己順行又垂教來世也既美其所稱又美其所為者釋上下皆得也所稱謂先祖也所為謂己身行業也君子有德之士觀銘必見此二事之美為之者謂為銘之人也明足以見之者謂己有顯明之德足以見先祖之美仁足以與之者謂己有仁恩故君上足以著先祖之銘與之知足以利之者謂己有知謀足以利益於己得上比先祖也可謂賢矣者言為銘之人備此三事所以為

賢賢而勿伐可謂恭矣者既備三事為賢又不自伐是為恭也故云可謂恭矣公曰至休哉者此一節是孔悝父祖鼎銘之辭叔舅者孔悝是異姓大夫年幼故稱叔舅乃祖莊叔者乃女也祖莊叔者謂孔悝之先祖孔達也左右成公者左右助也輔助衛成公成公乃命莊叔隨難于漢陽者難謂成公被晉所伐出奔于楚謂成公命孔達隨出逃難而往漢陽即是楚地在漢水之北即宮于宗周者即就也宮謂宮室成公後得反國又坐殺弟叔武被晉討之歸于京師寘於深室之中是即宮也奔走無射者言孔達隨難漢陽及即宮於宗周常奔走勞苦無厭倦啓右獻公獻公乃命成叔纂乃祖服者啓開也右助也言莊叔餘功流於後世能右助獻公獻公雖復出奔乃得反國其時孔達之孫成叔輔佐獻公故獻公乃命成叔纂繼女祖孔達舊所服行之事乃考文叔者孔圉是孔悝之父故云乃考與舊者欲者言父圉能與行先祖舊德者欲所為作率慶士躬恤衛國其勤

公家夙夜不解民咸曰休哉者作起也率循也慶善也
士事也言孔惺能起發依循善事躬憂恤衛國勤勞公
家早夜不解倦民皆曰功德休美哉此是孔惺先祖功
業鼎銘之辭也公曰至考服者此一節明前暗與孔惺
銘之言也及勅戒之使繼先祖故云纂乃考服惺拜至
彝鼎者此一節明孔惺拜受君恩言己光揚先祖之德
行君之大命著於彝鼎對揚以辟之者對遂也揚稱揚
也辟明也言己遂稱揚君命以光明我先祖之美勤大
命施于烝彝鼎者勤行也施著也烝謂烝祭言己勤行
君之大命著於烝祭之彝尊及鼎也此衛孔惺之鼎銘
也者記者錄其銘故以結之但休哉以上是稱其先祖
公曰叔舅以下至烝彝鼎是自著其名於下是以身比焉
比先祖也注正義曰烈業也釋詁文世功曰勲事功曰
勞周禮司勲文云傳著於鐘鼎也者傳附也言鐫勒先
祖功名附著於鐘鼎或解傳為傳述於鐘鼎義亦通也
云自著名以稱揚先祖之德者解經身比焉云孝順之

行也者以解經順也云教也所以教後世者言稱先祖
明示後世所以教後世使如先祖之善也故云教也云
德孔悝之立己者案哀公二年晉趙鞅納蒯瞶于戚至
哀十五年傳云衛孔圉娶蒯瞶之姊生悝孔氏之豎渾
良夫通於伯姬伯姬使良夫往蒯瞶蒯瞶與良夫入衛
舍孔氏之外園遂入適伯姬氏伯姬與大子五人迫孔
悝於廁強盟之遂刼以登臺於是得國是德孔悝之立
已也假至也釋詁文云至於大廟謂以夏之孟夏禘祭
者以經云六月是周之六月是夏之孟月禘祭之時以
諸侯命臣在於祭日案左傳哀十五年冬蒯瞶得國十
六年六月衛侯飲孔悝酒而逐之此得六月命之者蓋
命後即逐之故俱在六月莊叔悝七世之祖者案世本
莊叔連生得閭叔穀穀生成叔烝鉏鉏生頃叔羅羅生
昭叔起起生文叔圉圉生悝莊叔是悝七世祖也云成
公為晉文公所伐出奔楚者案僖二十八年左傳稱衛
與楚晉文公敗楚於城濮衛侯懼出居於襄牛遂奔楚

云生殺弟叔武晉人執而歸之於京師寘之深室也者亦僖二十八年左傳文晉人歸衛侯入其室弟叔武將沐聞君至喜捉髮走出前驅欵矢射而殺之其大夫元咺出奔晉訟衛侯衛侯不勝執衛侯歸之于京師寘諸深室是其事也案左傳於時無孔達之事而云云者傳文不具或者剽竊欲褒美孔悝故假其先祖之功而言之也獻公衛侯衍成公曾孫也者案衛世家衛成公生穆公穆公生定公定公生獻公是衍為成公曾孫云亦失國得反者案襄十四年左傳稱衛孫文子甯惠子逐衛侯衛侯出奔齊是亦失國也稱亦者亦成公也其時亦非成叔之功假言之也云纂繼也服事也釋詁文下注率循也亦釋詁文

昔者周公旦有勳勞於天下周公既沒成王康王追念周公之所以勳勞者而欲尊魯故賜之以重祭外祭則

郊社是也內祭則大嘗禘是也注言此者王室所銘若

周公之功音義

誣音無不傳直專反不本亦作弗

夫大嘗禘升歌清廟

下而管象朱干玉戚以舞大武八佾以舞大夏此天子

之樂也康周公故以賜魯也注清廟頌文王之詩也管

象吹管而舞武象之樂也朱干赤盾戚斧也此武象之

舞所執也佾猶列也大夏禹樂文舞也執羽籥文武之

舞皆八列互言之耳康猶褒大也易晉卦曰康侯用錫

馬音義

佾音逸盾食準反又音允籥半灼反

子孫纂之至于今不廢所以

明周公之德而又以重其國也注不廢不廢其此禮樂

也重猶尊也疏

正義曰此一節因上說鼎銘明先祖之善故此明周公之勳子孫纂之特重於

餘國亦光揚之事外祭則郊社者諸侯常祭唯社稷以下魯之祭社與郊連文則備用天子之禮也內祭則大嘗禘者祫祭在秋也大嘗禘祭在夏也是大嘗禘得用天子之禮則升歌清廟及舞大武大夏之屬皆謂天子之禮皆以為大嘗禘也餘諸侯則不得大嘗禘升歌清廟者升堂歌清廟清廟頌文王之詩也下而管象者堂下吹管而舞武象之樂也朱干玉戚以舞大武者朱干亦盾也戚斧也以玉飾其柄此武象之舞所執八佾以舞大夏者大夏禹樂之舞也執羽籥此天子之樂也康周公故以賜魯也者升歌清廟以下並是天子之樂故以此結之也子孫至國也者言魯是周公子孫繼周公之後至今不廢此禮樂謂作記之時也所以明周公之

有德而又以尊重其魯國也注正義曰言文武之舞皆
八列五言之耳者以經云八佾以舞大夏舞大武不顯
佾數則舞大武亦八佾也大武云朱干玉戚其大夏則
不用朱干玉戚當用羽籥而云五文者以大夏言舞數
則大武亦當有舞數大武言所執舞器則大夏亦有舞
器故云五也易晉卦康侯用錫馬者證康是褒崇之義
宋易晉卦坤下離上日出於
地為晉晉進也言明進也

禮記注疏卷四十九

禮記注疏卷四十九考證

祭統祭者所以追養繼孝也○按此當自為一節不連

上文

不求其為疏承致多福無疆子女孝孫侯女受祿于天

○當作于女孝孫于字訛于使女使字訛侯俱以字
形相近而誤

孝者畜也疏謂畜養云云○臣召南按疏未當其引緯

書亦非經意但孔子閒居以畜萬邦注云畜孝也疏

即引此經為證似古人舊解如此劉氏曰畜者藏也
中心藏之而不忘天叙之倫焉詩云中心藏之何日
忘之此畜之義也其說較長

水草之菹注疏朝事之豆茆菹麋○臣召南按麋當

作麋音京倫反又加豆之實有深蒲醯醢當作醢醢
又昆蟲之屬上脫是字

凡天之所生○臣召南按此節應接連前文寓至是故
天子親耕於南郊則又另是一節也

宗婦執盜從夫人薦浼水音義從夫人絕句一讀以從
字絕句○臣召南按此則音義與疏句讀不同疏讀
宗婦執盜從句夫人薦浼水句

舞莫重於武宿夜注武曲名也疏皇氏云師說書傳云
武王伐紂至於商郊停止宿夜士卒皆歡樂歌舞以
達旦因名焉○臣召南按此節大武樂之舞曲也周
語伶州鳩曰王以二月癸亥夜陳未畢而雨以夷則
之上宮畢之此宿於商郊之明證也大雅曰上帝臨

汝無貳爾心又曰會朝清明則士卒歡樂歌舞之明證也

鋪筵設同几疏故鄭注同几筵云○按當作司几筵君迎牲而不迎尸別嫌也注不迎尸者欲全其尊也○

臣召南按特牲饋食禮祝迎尸於門外主人降立於阼階東賈疏曰此士禮雖無君道亦以尊尸不親迎之則成尸之道尊也又按大司樂尸出入奏肆夏然則大祝迎尸入門奏肆夏矣

公曰叔舅○王氏曰崩賸惺之舅而惺則甥今反謂之
叔舅其倣周禮同姓之臣稱伯父叔父異姓之臣稱
伯舅叔舅歟

惺拜稽首曰對揚以辟之句勤大命施於烝彝鼎句○

此注疏讀也陳澧曰對揚至烝彝鼎十三字止作一句
言對答揚舉用吾君殷勤之大命施及於烝祭之彝
尊及鼎也辟音壁臣召南按注以辟為明非也陳澧
讀是

以比其身以重其國家如此注莊公孔悝雖無令德以終其事於禮是行之非○臣召南按此注一段無疏推按文義鄭謂莊公孔悝皆不足以當之其辭則合於古其行則戾於今作記者祇因其辭可取故錄之非謂孔悝為賢人君子能稱揚其先祖之美也注當讀雖無令德以終絕句其事於禮是絕句行之非絕句

疏是夏之孟月禘祭之時○按孟月當作四月

升歌清廟下而管象注吹管而舞武象之樂也○臣召

南按此疏未明當以詩疏證之周頌於皇武王序曰
武奏大武也疏曰周公象武王伐紂之事作大武之
樂此本文所謂象也至維清緝熙序曰維清奏象武
注曰武王制焉疏曰左傳見舞象箭南籥者傳直言
舞象象下更無武字則此樂名象而已象武之樂象
文王之事其大武之樂象武王之事二者俱是為象
故文王世子明堂位祭統皆云升歌清廟下管象明

堂位注象謂周頌武也必知象非維清者若是維清則與清廟並是文王之樂不容一升一下有尊卑之異也

禮記注疏卷四十九考證

謹案卷四十八第八頁前四行疏不使傾危以辱親也刊本傾訛預今改

後四行疏名之曰教孝刊本教亦訛孝據毛本改
後五行疏言不能備考之德刊本監本毛本備訛
稱據宋本改

第十四頁後六行疏田畢頒禽之時刊本畢訛軍
今改

第十六頁前一行疏父謂君老也句疑有誤

第十七頁前一行疏干盾也刊本干訛于今改
後三行疏謂巡行守土諸侯刊本侯訛侯今改
第十八頁前八行疏計長幼為班序諸本班訛世
據宋本改

第二十二頁前一行疏言中心思慮刊本中訛忠
今改

卷四十九第一頁後五行疏此說祭為急者刊本
祭訛禮今改

後六行嘉禮之別刊本嘉訛喜今改

第二頁前一行疏怵惕之義刊本惕訛惕今改

第四頁後七行注咸皆也刊本皆訛是今改

第十二頁後四行疏其政善也刊本政善訛善政

今改

第十八頁前七行疏以非時而祭刊本以訛似又
君尊尚爵賞於廟刊本尚訛上今並改

第十九頁前五行疏不能執故處刊本執訛致據

毛本改

第二十三頁前四行注萬人為子孫句疑有誤

第二十四頁後七行注傳著於鐘鼎也刊本傳訛
傳今改

第二十八頁前三行疏而已身親自著名次於下
諸本親訛雖據宋本改

第二十九頁後七行疏鉏生頃叔羅刊本頃訛頃
今改

第三十頁後一行注王室所銘刊本王訛至今改





覆校官編修臣朱依魯

校對官庶吉士臣閔惇大

膳錄貢生臣王廷樞

膳錄監生臣沈啟晉